

摘藻堂四庫全書薈要

史部

欽定四庫全書薈要

史部

硃批諭旨卷一百二十六之二十四

詳校官編修臣繆晉

欽定四庫全書薈要卷八千六十三

史部

硃批諭旨卷一百二十六之二十四

硃批田文鏡奏摺



雍正十年五月十一日河東總督臣田文鏡謹
奏為恭奏河東兩省得雨日期仰祈

睿鑒事竊查豫省二麥現今成熟民間收穫過半不日
可以登場臣復密差人員分頭查看今麥粒比往
年倍加堅實不獨河以南之開歸等五府汝陳等

七州屬均係豐收即河以北之彰衛懷三府亦有
六七分八九分收成不等俟查明實在分數容臣
另摺恭

奏至東省除登萊青三府莒州所屬原未缺雨現在
麥穗垂成秋禾長發外再濟南一府所屬自四月
十六日已得透雨之後又復連得雨澤二麥收成
約有七八九分可望秋禾佈種者皆已長發未種
者及時耕種惟兗東二府及泰濱武東高濮曹等

州所屬地方得雨未足二麥已有失收秋禾尚有
未種者據各屬陸續具報自四月十六七二十三
五六八九等日屢次得雨或一二寸至三四寸不
等各色秋花農人乘此雨後俱已一律播種臣已
遵先事圖維之

諭旨會同撫臣岳濬預行辦理查各屬現在貯穀五十
八萬石零米三十九萬石零又奉

旨准截南漕四十萬石以備賑濟之用並飭各屬勤慎

搏節毋致遺濫嚴禁燒鍋躡麪勸令富戶出糶招
徠商販米石務使民食充裕撫恤得所以慰

聖懷所有河東兩省得雨日期理合繕摺恭

奏伏乞

睿鑒為此謹

奏

頃聞山東甚旱奏內未免有粉飾之詞上下一誠相通
方無隔礙不可稍涉回護

雍正十年五月十八日河東總督臣田文鏡謹
奏為據實具奏仰祈

睿鑒事竊查豫省二麥業已收穫登場仰蒙

皇上修省勤求

聖德格

天今歲全省收成不但俱登豐稔而且麥粒比往年倍加

堅實經臣奏

聞在案惟是豫省地居天中北通直隸西聯秦晉南接

江淮湖楚四方輻輳商販羣集甫得收穫之時即絡繹販運他往雖普天莫非

王土過糴在所應禁出其有餘以濟民食自無不可然河南蒙

聖朝休養有年戶口滋生食指實屬浩繁兼之愚民嗜利忘遠不知耕三餘一耕九餘三之道儘其所餘任意糶賣茲據各屬稟稱他省客商來豫糶麥者陸則車運水則船裝往來如織不絕於道臣既不

可違例遏糴竟行禁止又不可任其搬運致鮮蓋
藏惟有飭令地方官多方勸諭令其早為積貯以
備不虞各崇節儉以惜物力不得因收成豐稔遂
忘無已太康之戒總期糧食充裕以仰副

皇上愛養黎元至意此實臣之私心然不敢不繕摺

奏明仰祈

睿鑒謹

奏

教民積貯固是正恐乏勸諭之方耳

同日又

奏為遵

旨預行辦理并東兗二府現在情形仰慰

聖懷事竊照東省濟兗東三府地方上冬少雪入春無
雨臣自本年正月間已切隱憂思為留前裕後之
圖有備無虞之計伏查東省倉穀自雍正八年被
水賑濟之後所在皆空蒙

皇上天恩以雍正九年漕米折穀抵賑又截留南漕通
奉等米共九十萬石自前署司孫蘭芬倡為易霉
恐累之說急於出糶凡貯米各屬起而效尤不數
月間糶賣四十餘萬石經臣將孫蘭芬奏參嚴飭
各屬止許零星出糶以平市價以濟民食現今尚
存四十餘萬石幸而濟南一府自三月下旬屢次
得雨至四月十六日大雨深透今五月初五初七
又連得大雨甚為普遍現在二麥登場秋禾長茂

市價甚平民情安帖毋庸置議外惟東兗二府及
泰武濱曹東高濮沂八州臣通盤打算現存倉穀
五十八萬有零南漕通奉米除派撥別屬外現存
三十九萬有零恐有不敷議請截留南漕四十萬
又恐往返需時密劄撫臣岳濬就近奏請蒙

皇上天恩俞允并寬免各關口樁頭米稅以通商賈今
南省商船連檣而至本處商人亦皆攜資往販據
署布政司事按察使唐綏祖稟稱撫臣岳濬之意

有存貯臨倉耗羨銀萬餘兩意欲動用此項差員
赴邳徐一帶買麥似屬有益應聽撫臣岳濬奏請
動用臣又嚴禁燒鍋躉麵勸令富戶將餘糧即在
本地出糶并不許姦牙收囤射利病民是以各屬
集市糧食尚多價值不能驟長但市糧雖屬充盈
止可買食誠如

聖諭不能為窮苦百姓普遍之利

臣仰體

聖心急籌目前接濟之策無過於散米一法於乏食災

黎深有裨並現在與撫藩悉心經畫尅期舉行遴選賢員實力辦理務使窮民得需

恩澤不致流離失所以仰副

皇上愛養黎元之至意臣查東兗二府并各州屬現在二麥尚有薄收者三十八州縣二麥竟至失收者二十一州縣有此米穀儘可接至秋收止須查辦妥協不致遺漏冒濫自必各得其所近據各屬報到五月初五初六初七等日均得甘霖秋禾已種

者條達暢茂未種者現在播種各勤農業民情甚
安將來再得時雨豐收可望理合將臣遵

旨辦理事務并各屬現在情形具摺奏

聞仰慰

聖懷為此謹

奏

覽奏東兗二府泰安等八州米價未昂并近日復經得
雨情形憂懷為之稍減

雍正十年五月二十七日河東總督臣田文鏡謹
奏為遵

旨通融辦理

恩賞鎮兵生息銀兩以廣

皇仁事竊照馬步戰守兵丁蒙

皇上逾格天恩軫念其家遇有吉凶之事費無從辦賞
給銀兩營運生息以濟其用此從古未聞於今特
見之

曠典也夫

天恩之下逮雖如雨露之潤物當纖巨而同霑然亦如
川源之就下必盈科而後進是以由內及外由滿
及漢由督撫提標而及鎮次第賞給至於各協兵
丁自應靜候軍務告竣

國用克饒之日周遍加

恩乃遽欲同沾妄生冀倖此實伊等之不揆時度勢量
力衡情也然臣以為協兵之未得同霑者實由督

撫提鎮大臣辦理失宜之所致非盡在於

推恩被澤之自有後先也蓋天下協標兵丁非隸於督
提即轄於總鎮其隸於督提者原為督提之親標
恩賞銀兩即應在於督提生息銀內推及其轄於總鎮
者即係總鎮之親標

恩賞銀兩即應在於總鎮生息銀內推及臣愚以為不
獨協兵即推而至於叅遊都守營分以及沿江沿
海水師兵丁何莫非督提總鎮分屬之標有何區

別竊恐望

恩之急彼此同情非分之邀遠近一體若不遍及則
施恩似有偏枯如欲同沾則經費亦當通算臣伏查此
項生息銀兩乃格外

殊恩原非兵丁分所應得之賞惟當視其兵丁之衆寡
利息之盈虧酌量均攤通融勻派多則多分少則
少給如豫省北鎮九營共兵五千一百三十九名
南鎮八營共兵四千九百二十一名東省兗鎮十

四營共兵七千五百三十九名登鎮十三營共兵
九千一百八十名查四鎮共馬步兵二萬六千七
百七十九名內除四鎮隨標中左右營兵共八千
五十八名得沾

恩賞外尚有外營之一萬八千七百二十一名均未沾
恩登鎮之兵較三鎮頗多故

特賞銀一萬兩其餘三鎮各六千兩除各官養糧公糧
無庸賞給現在出征兵丁照部定數目賞給外其

餘各營臣約畧計算雖不能如部定馬兵吉禮六兩喪禮八兩步兵吉禮四兩喪禮六兩之數然亦得各沾實惠無庸岐視者也今據四鎮呈報每年加一五起息止賞同城中左右營等語殊未得宜臣查馬步兵丁餉則有多寡之不同而米則每月同領三斗初無分別今吉凶賞銀當此創始之時實無庸分別馬步請照月米之例一律酌量吉禮賞銀二兩喪禮賞銀四兩已足接濟況吉凶二事

非家家常有之事或一家數年而一遇或一家數年而不遇如一年之內吉喪事少銀有盈餘令於年底造報留為次年之用生息之銀既日積而日多則賞給之額亦可續增而漸廣更不必執一而論賞兵次第先鎮後協積有餘銀再及各營如此辦理費用無多可以周徧臣再查臣標及河南南北兩鎮標下原無協營惟東省充鎮標下管轄臨清沂州二協登鎮標下管轄文登膠州二協雖稱

協鎮原屬鎮標以臣愚見即叅遊都守各營尚請
在於該鎮賞銀內分給何況協營儘可變通似無
有不能行之處從此而經費有餘再沛

天恩賞及協兵亦止宜於該鎮原賞銀內加增不必另
立協兵生息名色即不再賞而該鎮原賞所生之
息日積月累亦足贍給似此稍為變通方為大公
庶可垂久是否可行理合奏請

皇上訓示遵行為此謹

奏

通融辦理之議似覺不甚妥協難以施行候朕再加裁奪另有諭旨

雍正十年閏五月十七日河東總督臣田文鏡謹
奏為據實奏

聞仰祈

睿鑒事竊照山東東兗二府今春少雨二麥歉收仰蒙
皇上天恩軫念黎元恐致乏食失所

特施賑恤臣敬繹

恩綸或散米或煮粥或借貸倉穀原令因地制宜非令三者並行臣因天氣暑熱粥易作酸未便煮賑外飭令地方官俾知

旨中散者指米而言借者指穀而言散米而不責償者專指赤貧饑口而言借穀以待有秋者專指有產災黎而言然而二者之中究以散米為先務蓋東省舊貯糴存南漕通奉各米共四十餘萬石又蒙

恩截留南漕四十萬石儘可敷用分別大小口按月散
給接至秋收貧民得食免饑不須借領責償其感
沐

天恩更為深至臣仰遵因地制宜之

諭旨是以散米為先務宜急借穀為後圖可緩也再履
畝勘災計口授食此

國家一定之常經災則必以收成分數為程賑則必
以戶口冊籍為據舍此常經便同棼絲難理別無

簡便法門臣因奉

旨諄切貧民口食不可少緩須臾飭令一面將原貯撥
運米石查有實在乏食朝不待暮之貧民先行賑
恤一面仍遴委道員督同府州縣分頭查勘災傷
編戶給票領賑庶幾無遺無濫否則逢人即給以
致不應賑者賑而應賑者不賑矣臣又以為愚民
不知撙節多領必至花銷誠恐地方官樂於簡便
將數月口糧一時散給以致日後仍至乏食輕去

其鄉此時坐視不可再賑不能豈非悞事節經臣
熟思長慮以求萬全公牘書函不下數千萬言俱
行山東布政司確議飭遵在案又蒙

皇上恩准光祿寺卿王潯奏請奉

旨所派克東等本地人員即令王潯帶領商同辦理欽
此仰見

聖慮周詳以本地之人辦本地之賑自必極公至當不
意王潯桑梓情深過於從厚不為

國家度支出亦不為災黎經理舒徐意欲將四箇月口糧減作三箇月加增戶口復欲於賑米之外再借倉穀因撫臣岳濬有借穀不如借銀之言又欲於借給籽粒之外再借銀兩經兗沂莒道萬國宣兗州府知府沈斯厚委婉商請以甘霖普降秋禾已種自應凜遵

聖諭因地制宜而王漭甚為拂然遂堅執已意面飭滋陽縣知縣茅瑛務必借給有意更張事多掣肘具

稟到臣并接河臣朱藻來字亦云王潯辦賑甚不
妥協有遍及邀譽之意等語臣恐似此意見齟齬
小民無厭一聞王潯之言即頑紳劣衿地豪土棍
本非乏食災民亦必赴官紛擾將來未能辦理妥
帖即日費數萬帑金數萬倉米亦不能盡如人意
於賑務深有未便臣遠處豫省既有所聞不敢不
據實奏

聞仰祈

睿鑒臣查東省各道府州縣多係雍正八年辦過賑務
諳練之員且既有

命來候補候選人員選拔貢生已足差遣可否將本省
人員王潯等掣回以杜瞻顧桑梓掠美市恩之弊
理合并請

皇上欽定訓示遵行為此謹

奏

所奏是已有旨將王潯等掣回矣

雍正十年六月初三日河東總督臣田文鏡謹
奏為續叅市恩擾賑之卿員仰祈

睿鑒事竊照山東東兗二府春夏少雨麥收歉薄蒙
皇上軫念民艱溥施賑恤乃光祿寺卿王潯並不敬繹
聖諭因地制宜乃一味加厚桑梓更張掣肘業經臣奏
聞在案臣竊以為查災辦賑

國家自有一定不易之常經無庸攬入私意浮言致
滋紊亂且情形時有不同不可不隨時斟酌當被

旱之日野多赤地秋田無望不得不廣為賑救及至得有透雨百穀發生傭工力作即可覓值資生野藪畦蔬皆得易錢餬口況採山釣水果熟瓜成所在皆養生之資無處非救饑之物所有應賑戶口自當逐一核確以杜浮濫臣是以與撫臣岳濬商酌先將赤貧無依並遮留歸里者給以口糧至有地拋荒無力補種者借以籽粒臣等非特為國家度支出納留前裕後也誠以窮民得早賑一日

即免一日之饑姦民少冒賑一口即救一口之命

茲據原署山東布政司印務按察使唐綏祖稟稱
王潄為人剛愎自用本無學識初到時原有獨出
心裁之意及閱司詳并臣節次檄飭條約茫然若
失遂倡為借銀之說以示立異之意且儼然以
欽差自命出示曉諭知府打恭竟不下轎語言少拂其
意即毅然作色州縣而下呵斥自由並不下鄉細
查務欲廣為散給擅作主張殊與商同辦理之

諭旨相違若聽此人措置不但無益地方必致滋生事
端等語又據布政使鄭禪寶稟稱王潯係自行奏
請來東効力原非

欽差可比自不宜攬越已見紛更掣肘山左百姓連歲
疊蒙

皇恩至深至重今夏缺雨較之八年被水尚有輕重之
分自應先事圖維留前裕後方為萬全倘若濫行
賑借糜費倉庫有何底止等語又據充莒沂道萬

國宣稟稱王滄諭令沂州知州葉粵凡有田多紳
衿之佃戶著田主具呈借領穀石又令沂州借給
籽種銀九百餘兩到嶧縣諭令該署縣王天慶將
短工無地次貧之人俱填入極貧冊內一體給賑
並於通衢曉諭俱借工本立給倉糧以致該縣惶
悚無措又至滕縣諭令該縣黃元軫輓運截留漕
米數萬石就近借給該縣以現在奉文賑米不便
再借回覆而王滄又云只管借給有我擔任等語

竊思田多紳衿之佃戶並非赤貧窮民何得擅動
倉穀籽粒銀兩必須查明實在務農貧民現在有
地未種可驗者方可借給何能預定銀數至九百
餘兩之多在王潯不過欲邀譽桑梓罔顧糜費錢
糧等語又據曹東道王鴻勳稟稱王潯為人執拗
欲散給銀兩所帶部屬五員惟郎中尚為煥至濟
寧頗覺安靜等語又據兗州府知府沈斯厚稟稱
王潯至各縣即諭令將米借給紳衿佃戶又索取

各縣賑票帶領舉人陳伸等沿途散給又批發廩膳生員等呈俱令一體賑給沿途一切儀從伺候自作威福等語又據濟寧州知州張綸稟稱王潛到州自坐堂上點賑放米任意增減地方官不得旁叅一語又諭令生員一體借給銀兩不拘何項錢糧按名分散回以庫貯無項可動即作色云我已摺奏貧士亦當周恤等語臣查此番賑務欽奉諭旨交與撫藩二臣因地制宜悉心經畫之事王潛不

過奏請自願來東協辦奉

旨俞允其請乃並不商同臣等秉公辦理一味自專止

圖市恩邀譽不顧州縣米多米少有銀無銀張示
通衢號召領賑以致各屬徬徨無措強紳劣衿土
豪地棍羣起爭趨反致貧民候賑無期挨擠不上
司道等官皆無可如何莫能救止臣恐即有粟如
太倉陳陳相因財如源泉混混不舍亦不能徧給
不核之民盡飽無稽之腹誠孟子所謂惠而不知

為政者也臣不敢因已經奏

聞遂爾默默理合續叅伏祈

皇上睿鑒施行謹

奏

於前次奏到即經有旨調其回京王潯為人原屬愚魯
粗率然居心端直尚非不肖之流伊子王柔遇事勇往
向前是一實心効力之員但亦任性狂縱剛愎自用朕
因惜其材器難得以故時加訓誨而驅策之無瑕全璧

豈易覲耶

雍正十年六月十三日河東總督臣田文鏡謹

奏為恭繳

硃批仰祈

睿鑒事雍正十年六月初五日臣齋摺家人捧回臣奏
請掣回王潯等摺內欽奉

硃批所奏是已有旨將王潯等掣回矣欽此臣於未奉
諭旨之前續將王潯辦賑不協情由奏叅在案但臣續

叅之後又據兗莒沂道萬國宣稟據鉅野縣知縣
廖開春稟稱查辦賑務既按戶分別大小口給米
則婦女亦在一戶之內乃王潯另將婦女准給以
致婦女希圖重領擁擠不散王潯亦自謂鉅民之
不可施恩束手無策又王潯將溫飽生監鄒玠等
四十名每名給以兩大口准照貧民一體均賑四
箇月查各生監俱有田房產業並不乏食因有所
挾立催給米不得不遵照王潯批准呈詞按名散

給以致各生羣起效尤於六月初一日劣生徐湘等一百餘人聚集學宮勒令知縣借給穀石大聲嫚罵教官目覩不敢約束等情到臣現行山東布政司嚴查外臣查王潯與檢討隋人鵬情願來東商同辦理賑務隋人鵬分查東昌府屬悉照臣等經畫辦理並不紛更掣肘已於閏五月二十以前各屬先後開賑民情安帖王潯分查兗州府屬獨出已裁邀譽鄉里市恩於冒濫之婦女溫飽之

生監致長刁風至今未據各屬具報開賑日期反致饑民不得領米貽害民生莫此為甚臣已密劄撫藩二臣速飭核實早為開賑臣不敢因王滄等已經奉

旨掣回遂爾隱默理合奏

聞仰祈

睿鑒所有奉到原摺一併恭繳為此謹

奏

據奏王潯市恩鄉里致長刁風種種不協可與岳濬商酌查明會疏題叅

同日又

奏為據實奏

聞仰祈

睿鑒事竊照大臣官員子弟設立官號乃

聖朝優待臣工賞延於世之至意典至鉅也伏查定例內官員子弟應試有本係嫡子孫及同胞兄弟并

同胞兄弟之子曾經出繼者俱不准入官號等語
凡所以厚本支而重嫡派杜假借而嚴混冒者至
詳至慎從未聞有以異姓之子冒入官號濫叨中
式如革職兵部右侍郎胡煦之罔上行私者查胡
煦止有親生一子其長子名孟基本姓邱原係光
山縣故民邱自先之子隨母胡氏改嫁胡煦時孟
基年已四歲煦將孟基作為己子改冒胡姓入學
復於雍正二年編入官卷倖中甲辰科河南鄉試

第二十八名舉人濫竊名器此皆從前學臣試臣
及地方官教官失於查察之故臣既體訪確實若
不據實奏明將來會試屆期萬一僥倖中式事關
科場多有未便是以不敢隱諱據實奏

聞仰祈

睿鑒謹

奏

該部嚴察議奏

同日又

奏為奏明事竊照按察使陳世倬胞弟舉人陳世倻素知醫道經臣於雍正八年五月間奏請

聖恩賞發來豫欽奉

諭旨交臣酌量委署試用臣上年進京之日適開封府管糧通判員缺乏人臣即委陳世倻署理臣嗣奉恩旨回豫復經臣面

奏請將陳世倻仍留臣署學習兼資朝夕診視又蒙

皇上俞允欽遵在案近因臣於本年四月內感冒風寒之後兼患痢疾訪有專門世醫診脉用藥頗稱切當況臣病已全愈止須調補氣體可以無庸再留陳世倌在署醫治查陳世倌原係奉

旨交臣酌量委署試用之員應令其及時試用以觀後效但伊胞兄陳世倬現任河南按察司例應迴避不便在於豫省試用臣擬將陳世倌前往東省會同撫臣岳濬遵

旨酌量委署理合繕摺

奏明伏乞

睿鑒訓示遵行為此謹

奏

卿疾雖愈尚需調理朝夕診視豈可乏人陳世倌之得蒙委署原因醫卿始邀斯恩如果才具可取將卿調治大愈時朕格外優擢不勝似伊揆俸陞遷乎目下何必如是急於見用若初借醫病為進身之階未奏全功遽

求速用在陳世倌則屬躁競妄舉或專係陳世倌之謀此等居心更難望乃弟將來成就設出自卿意亦非愛之之道將此所批諭旨與伊弟兄觀之

雍正十年七月初四日河東總督臣田文鏡謹

奏為恭繳

硃批仰祈

睿鑒事雍正十年六月二十一日臣齋摺家人回豫荷

蒙

皇上賜臣寶丹臣恭即望

闕叩頭謝

此丹修合精工奏效殊異放膽服之莫稍懷疑乃有益

恩祇領如法服食容臣服食有效再謹奏

無損良藥也朕知之最確

聞又於臣續奏王潛摺內欽奉

硃批於前次奏到即經有旨調其回京王潛為人原屬
愚魯粗率然居心端直尚非不肖之流伊子王柔遇
事勇往向前是一實心效力之員但亦任性狂縱剛
愎自用朕因惜其材器難得以故時加訓誨而驅策

之無瑕全璧豈易覲耶欽此伏查王滂此番辦理賑務甚欠妥協誠如

聖諭愚魯粗率幸蒙

聖明遠照即頒

諭旨調回然臣前既有所知不敢因已經奏

聞遂不再據實陳奏至臣與王滂原素未謀面今蒙聖諭始知王滂并其子王柔為人益仰

睿鑒至明如日月之無不照臨因材任使如雨露之無

不栽培也臣不勝欽仰感激之至所有奉到原摺
理合恭繳謹

奏

於續奏王潯摺內雖經批令會叅卿其更加酌量若可
以中止則亦已焉耳

同日又

奏為據實具奏仰祈

睿鑒事竊查東省所屬之沂州嶧縣郯城汶上嘉祥鉅

野魚臺各州縣界臨運河并各湖灘水櫃臣因上
冬少雪入春以來雨澤又稀誠恐蝗蝻易於生發
欽遵

上諭預行各屬於水草叢生人跡罕到之處早為巡察
今據各屬具報果於此等處所生發蝻子蠕蠕蠢
動並未傷損禾苗除各屬漸次撲滅外惟郟城一
縣共四十五保内生蝻之處二十四保其縣西各
保撲滅約有四分縣南各保撲滅約有三分西北

各保撲滅約有五分打後復生較他處為多其東
南地接江南海州宿遷等處以馬陵山為界山之
上下蝗蝻生發尤盛臣即飛檄所屬文武多委員
弁會同地方官督率人夫分頭撲滅并行令地方
官照依前人買蝗之法捐價買捕毋致長成羽翼
飛食田禾為害鄰封并飭接壤州縣無分此疆彼
界協力幫捕去後容俟各屬捕淨之日結報到臣
再為核實具奏合先奏

聞伏乞

睿鑒謹

奏

螟螣蟲賊皆足以害苗而惟蝗最酷一令生翼飛騰則人力難施亟當嚴飭撲滅莫遺種類

同日又

奏為武職乏員急宜寬途廣拔以實營伍事竊惟用將之道任之宜專取才之途求之宜廣若必狃於

往規而不稍為通變格於成例而不量為權宜則
已用之將材僅有此數而後起之將材登進無門
鮮有不匱乏而拮据者也臣查臣標及臣所轄之
河南南北二鎮山東登兗二鎮各營將領自調取
出征遞行委署之後現在存營實授人員已屬無
幾兼之俸滿推陞緣事叅革因公累誤離任者又
在所不免每遇一缺出則通標遴選遞署實難其
人若例應題補必須選取人地相宜員缺相當無

叅罰合例人員更不易得近來即委署亦有甚難之處蓋員缺例應在外補者部中已不銓選間有在軍前推陞者急猝不能到任而現在營缺悉係署員一官又不便兼理兩缺臣每遇一缺出不但在於通標遴委嘗於通省兩鎮標營通融選拔近又合兩省一標四鎮通營選拔矣無如一標缺員各標亦復如是一鎮少人各鎮更覺艱難此所以題補難委署亦難也臣查臣標二營自副將都司

守備以至千把共十五員內實授者四員缺官署
理者十一員南鎮八營自叅遊都守以至千把共
四十九員內實授者七員缺官與署理者四十二
員北鎮九營自叅遊都守以至千把共五十一員
內實授者三員缺官與署理者四十八員充鎮十
四營自副將叅遊都守以至千把共八十七員內
實授者十四員缺官與署理者七十三員登鎮十
三營自副將叅遊都守以至千把共九十三員內

實授者四員缺官與署理者八十九員似此人少
缺多官皆借署營伍則料理無人日漸廢弛兵丁
則約束不謹日漸驕縱所關甚鉅又不獨在於題
補遴署之煩難而已臣於上年在京時曾將將材
難得情由跪奏面奉

訓旨在於兵丁內選拔仰見

皇上至聖至明

發揮指示皆屬不易之至論但將備弁兵自分等級以

次而拔相遞而陞此定制也今在上將領之缺日見虛懸而在下千把之缺每難陞讓則兵丁之中雖有可用之才何由而得缺拔補兵丁不得上拔將材又何由而得人不幾與臣在京跪奉之

諭旨實相違悖臣於是推其所以然之故益千把末弁

無不分守汎地其任內別無他事叅罰惟緝盜考成人人不免必以案內盜犯全獲始為合例方得陞轉然臣以為此法宜嚴於無事之時而當少寬

假於軍興之日臣仰見

皇上求才必得立賢無方凡督撫題陞文員亦必選取
合例然每於不合例之員因其才有可用即於疏
尾將伊任內叅罰各案查出聲明候

旨定奪每蒙

皇上不構成例量才拔用臣竊以為文武一體斯道既
可

加恩於文員亦不妨推及於武職臣請嗣後題補武職

一時難得合例之員准照文員之例於疏尾將任
內叅罰聲明候

旨定奪其引

見已過三年者照例給咨送部引

見至考拔千把總例不具題亦即於咨部文內將叅罰

聲明准其拔補俟大兵凱旋各官回任之日仍照

定例遵行似此一轉移間則不合例之備弁得以

陞拔出缺而在下有用之兵丁亦得以依次考補

將見人材日出選拔無遺矣臣為營伍乏員起見
不揣冒昧據實

奏請是否可行伏乞

皇上睿鑒

特降諭旨

敕部施行為此謹

奏

題陞武職亦照文員之例於疏尾聲明各案叅罰所請

甚是候交部議覆有旨

雍正十年八月初三日河東總督臣田文鏡謹

奏為據實具奏仰慰

聖懷事竊查豫東二省自夏入秋雨暘時若其早種之
高粱穀黍等項俱已一律登場其晚種之穀黍花
豆等項亦俱暢茂條達結穗堅好據各屬具報及
臣差員訪查詢之耆老農民咸稱今歲秋收毋論
高原平隰以及傍山臨河地畝均有十分收成較

之往歲豐登更為大有至東兗二府自蒙

皇恩賑恤之後百姓俱各安居粒食又仰賴

聖德格

天雨澤應時秋成豐稔糧食充盈市價平賤除被災之在
平縣仍賑四箇月外餘俱分別減去一月二月河
東兩省人民熙熙皞皞共樂

堯天容俟兩省布政司將通省實在收成分數查報齊
全臣再核實奏

聞又查東省所屬之沂邳滕嶧等州縣蝗蝻生發俱在

湖灘水櫃人跡罕到之處隨生隨撲原不為害惟

因界連江南之海邳宿沛等州縣彼處生發尤甚

長成羽翼負子越湖飛入東境臣據各屬具報即

屢檄所屬文武各委員弁分頭撲滅并咨會江南

督撫二臣轉飭一體協力幫捕臣復設法指示如

在荒濱曠野則挑坑掘塹畀之以火瘞之以土如

在穀菽行間瓜蔬陌畔則償其籽種將生蝗之地

盡力撲捕茲據兗州府等具稟各屬蝗蝻俱已如
法撲淨並未損傷田禾臣隨檄布政司確查取結
在案再秋汛水勢隨長隨落河流循軌安瀾各處
工程俱各平穩合併奏

聞仰慰

聖懷為此謹

奏

覽奏豫東秋成豐稔河流順軌而蝗不為災實出朕之

望外甚為欣慰

同日又

奏為據實覆奏仰祈

睿鑒事雍正十年七月初七日臣齋摺家人捧回臣奏

請將陳世倌前往東省委署摺內欽奉

皇上硃批諭旨卿疾雖愈尚需調理朝夕診視豈可乏人陳世倌之得蒙委署原因醫卿始邀斯恩如果才具可取將卿調治大愈時朕格外優擢不勝似伊揆

俸陞遷乎目下何必如是急於見用若初借醫病為
進身之階未奏全功遽求速用在陳世倌則屬躁競
妄舉或專係陳世倌之謀此等居心更難望乃弟將
來成就設出自卿意亦非愛之之道將所批諭旨與
伊弟兄觀之欽此臣跪讀之下不禁感激涕零伏念
臣何人斯乃以犬馬微疴仰蒙

聖恩垂眷至於如此之隆如此之篤臣即望

闕叩頭恭謝

天恩外隨傳陳世倅陳世倅同到臣署敬將

諭旨捧出令其同看據陳世倅陳世倅稟稱伏讀

諭旨惶悚無地實不敢萌此速於求用之心懇求仍在

臣署至再至三臣查陳世倅自雍正八年五月內

奏請

聖恩賞發來豫迄今已及二年臣每年給以束修銀兩

其家口俱移入臣署贍養在陳世倅雖明醫理止

宜於平時調劑稍有疑難之證便少把握臣自本

年四月內感冒風寒之後兼患痢疾陳世倌診脉
用藥兩月之久未能收功見效臣復徧行尋訪得
有專習醫道之人較之陳世倌更為切當臣服其
藥日有起色臣病方得全愈臣因思臣既有專醫
調治則陳世倌在署間居無事且臣仍須給以資
斧實臣一點鄙吝之私起此意見冒昧奏請臣從
前繕摺拜發之時敬謹慎密並未令陳世倌弟兄
得知實非出於伊弟兄之意今奉

諭旨諄切所有微臣區區私念不敢不瀝陳於

君父之前也臣仰懇

天恩可否仍將陳世倌前往山東會同撫臣岳濬酌量
委署試用臣未敢擅便理合據實覆奏伏候

皇上訓示遵行謹

奏

若據此奏而論是陳世倌醫御毫無功效更不應邀恩
試用矣卿果為惜資斧起見不欲久留署中則當令伊

回京歸班銓選奚庸前往山東委署試用於情於理均屬未協如何其可總之或仍留署或令歸部於斯二者卿酌量行之

雍正十年九月十五日河東總督臣田文鏡謹

奏為恭奏河東二省秋收分數仰祈

睿鑒事竊查今歲豫東兩省其早晚各色秋禾豐稔情

形業經臣奏

聞在案茲據河南布政使徐聚倫山東布政使鄭禪寶

各將合屬實在收成分數核確具報到臣復加
查核恭呈

御覽查河南開封府十四屬歸德府九屬彰德府七屬
衛輝府八屬懷慶府七屬河南府十一屬南陽府
十二屬汝寧府九屬各收成均有十分而開封彰
德汝寧三府為尤盛陳州并所屬四縣許州并所
屬四縣禹州并所屬二縣鄭州并所屬四縣陝州
并所屬二縣汝州并所屬四縣光州并所屬四縣

各收成均有十分而陳鄭汝光四州為尤盛又查
山東濟南府十四屬一衛兗州府十四屬二衛所
東昌府十三屬二衛青州府十屬一衛萊州府七
屬四衛所登州府八屬四衛各收成均有十分而
青萊二府為尤盛泰安州并所屬三縣武定州并
所屬三縣曹州并所屬四縣東平州并所屬四縣
濱州并所屬三縣沂州并所屬二縣高唐州并所
屬四縣濮州并所屬三縣莒州并所屬三縣各收

成均有十分而泰安武定濮莒四州為尤盛總之
今歲秋收豐稔實出人望想之外比往常大有之
年更為倍獲此皆仰賴

皇上至誠昭格

上天默佑是以雨暘時若年穀順成臻此極隆極盛臣不
勝懽慶感頌之至所有河東二省核確實在收成
分數謹繕摺恭

奏仰慰

聖懷至黃河南北兩岸堤工霜降已過水勢減落堤埽工程俱各平穩合併奏

聞謹

奏

以手加額覽焉今歲直隸豫東三省秋成實係望外之豐乃

上天非常嘉貺大造洪恩我君臣當愈加感戴倍增敬畏也

同日又

奏為仰懇

天恩解任調養事竊臣一介庸愚仰蒙

皇上畀以總督重任節制兩省封疆惟因才不副職是以日夜靡寧心力俱瘁而年齒亦衰自微臣報主之心而言即一息尚存不容少懈而自

皇上封疆之大而言當量力引退以讓賢能是以上年春間瀝血陳請得蒙

天恩解任進京調治疊荷

恩賜旋即痊愈從此有生之年皆

皇上再造之日也回任後正圖竭力報效以殫愚忠不
謂今年四月間感冒風寒旋轉痢疾直至六月方
得漸就痊愈可隨於八月內入闈監臨文場至九月
初一日出榜回署無如身體虛弱現在加意調養
日服參苓仍不能補足氣血復原如舊轉瞬武闈
即屆天氣就寒臣自揣微軀恐不能力疾從事致

悞大典是以據實奏請仰祈

聖恩允臣解任調治俟明年春融由水路進京仰覲
天顏跪聆

聖訓至河東總督原係奉

旨後不為例臣解任後自當將

欽給總督關防封送繳部仍祈

敕部將河南巡撫關防齎發來豫臣查副總河孫國璽

在豫半年小心勤慎堪以暫署河南巡撫印務庶

不致任意更張故為紛易臣性戇直又復孤介自持十年以來蒙

皇上擢用之恩猶為人之所同而蒙

皇上保全之恩惟有臣身所獨今以衰病日侵遽行求

退犬馬戀

主之私不覺情溢乎詞淚盈於楮容臣專心調攝倘得邀

聖恩日就痊愈則臣之仰圖報效正自有日矣謹繕摺

奏請伏乞

皇上睿鑒訓示如蒙

俞允臣遵即循例具

題請

旨敕部施行為此謹

奏

覽卿解任之請深用悵然另有諭旨交大學士轉發

同日又

奏為冒昧籲請

天恩仰祈

睿鑒事竊臣上年在京時荷蒙

聖恩賞臣瓊玉寶膏臣朝夕服食消痰止嗽甚有效益

前蒙

恩賜已為逾分何敢再行瀆請但臣犬馬微軀素蒙
聖慈顧復不揣冒昧仰懇

天恩再賞臣一服未審此膏原方可否并

賜與臣得以如法修合終身服食并求

皇上訓示臣不勝感激顙懇之至謹

奏

瓊玉膏既云有效則不宜間斷今併原方賜來如法修製頻頻服之可也

雍正十年九月十八日河東總督臣田文鏡山東巡撫臣岳濬謹

奏為遵

旨會商據實奏參仰祈

睿鑒事雍正十年八月二十九日臣等據山東按察使

唐綏祖鈔錄

皇上硃批該司招奏敬陳管見事一案

諭旨與督撫商酌會同奏請欽此臣等伏查積貯米穀

關係甚重夫既於需賑不敷之時籲請截留豈不

當於既賑有餘之際經營善後乃布政司不為之

查議而具詳臣等身為督撫不為之核實而具奏

直待按察司密摺奏

聞臣等與布政司所司何事方將引過請罪之不遑而
尚敢歸議於該司奏請之未是乎

皇上不即據其所請而

俞允

特令臣等商酌會奏仰見

至聖至明早有以知該司之所奏未必盡然而臣等之
坐視南漕不為乘時料理者未必無據如果宜急

糴易穀該司與臣等共事已久何難徑與臣等商酌且與撫臣同城晨夕相見更易於進言何必密為奏請彼固知南漕之宜暫存而不宜急糴係臣等飭行各屬遵照在案自不便再向臣等商請是以舍臣等而冒昧具奏彼其意不過欲取悅於愁霉懼爛之屬員而沽名邀譽於一時耳臣查東省現在應買之穀

皇恩有加無已等事案內除雍正九年改徵漕穀抵補

外尚有未買穀一百三十六萬八百三十石零又
查明府倉等事案內未買穀二十三萬六千二百
四十二石零一年不能俱行買足於壬子癸丑兩
年各半分買經部覆准在案此外又有應買平糶
虧空各項穀共四萬四千三百一十六石則是今
歲秋穀雖屬豐收而民間元氣未復本年應買之
穀共八千四萬二千九百餘石之多何可復行採
買以致穀少價昂有礙民食是斷斷不可糶漕易

穀也況秋收既豐民間各有新糧食用市上雜糧亦多南漕大米已難出糶該司欲於今歲糶漕即於今歲易穀為日不足言何貿貿即此已可見該司之不學無術也臣查南漕之在東省本非無用之物而該司因賑恤有餘恐致累手鰓鰓過慮冒昧瀆奏任意更張不可不請

旨創懲以為妄奏者戒臣近於京報中伏讀

上諭知江南地方又於七月十六日夜海潮湧溢被淹

敕令江南總督誠心撫綏無使流離失所至於今冬冰雪嚴寒之際明春青黃不接之時

敕令預為籌畫資其生計臣查江南自雍正八年被淹

蒙

皇上天恩特施賑救動用帑金數十萬兩各項倉糧數百萬石猶恐不敷

特旨允准浙江總督李衛奏請將浙米運至江南山東二省分截備賑在案今甫隔一年又被水患臣恐

南省倉貯一年之內未必即能克實莫若循照督
臣李衛運賑鄰省之例即將東省截留南米仍運
回江南備賑從德州臨清張秋濟寧等處水次連
檣而下輓運甚易并請照王潯隋人鵬之例將唐
綏祖暫解按察司任即將該司所請二十萬石南
漕令其雇覓船隻運至江南交與督撫布政司或
散賑或平糶以濟民食事竣仍回原任再南漕係
大米更為南人所宜如此一轉移間而在東不致

久貯為累既可邀譽於同官在南又得有大米資
生更可市恩於桑梓諒亦為該司所願并可以不
必計及倉廩之有無也緣係奉

旨商酌會奏事理臣等謹合詞具奏伏乞

皇上睿鑒訓示施行為此謹

奏

此項漕米照該督撫所請行

雍正十年十月初十日河東總督臣田文鏡謹

奏恭請

皇上聖安

朕躬甚安今歲以來覺健爽倍常此皆荷蒙

上天

聖祖眷佑所致實為過望卿體佳善否

同日又

奏為恭謝

天恩事竊臣前以瓊玉膏消痰止嗽是以冒昧籲請并

求原方仰蒙

皇上天恩膏方並錫并賞臣既濟寶丹此丹前蒙

恩賜臣服食以來微覺精神增益今又蒙

賞給凡斯

上方仙藥臣祇領之下實欣幸過望隨恭設香案望

闕叩頭恭謝

天恩所有微臣感激私忱謹繕摺奏

謝為此謹

奏

既濟丹朕現今服無間考其性不涉寒熱溫涼徵其效亦不在攻治疾病惟補益元氣是乃專功御服食將完時具摺奏請更當續賜

同日又

奏為恭謝

天恩事雍正十年十月初一日臣齋摺家人捧回臣奏請解任調理摺內欽奉

皇上硃批覽卿解任之請深用悵然另有諭旨交大學士轉發欽此並接大學士臣張廷玉字內開欽奉

諭旨河東總督事務朕已降旨令孫國璽協助田文鏡辦理其總督衙門養廉之項著田文鏡酌分數千金與孫國璽合之副總河之養廉期於敷用而已其餘仍留為田文鏡之用度欽此又於十月初四日准吏部咨欽奉

諭旨田文鏡著在任調攝不必懇請辭退孫國璽以副

總河協助田文鏡辦理總督事務凡似監場等事著
委任代理欽此欽遵臣即恭設香案望

闕叩頭恭謝

天恩並遵

旨令副河臣孫國璽考試武闈外伏念臣一介庸愚仰
蒙

皇上簡畀封疆節制兩省

隆恩疊錫固已浩蕩而靡涯

殊眷頻加更復保全而備篤臣犬馬圖報之心早已矢
諸身世之久當此未填溝壑之日正為少盡涓埃
之時何敢引退求閒自圖暇逸無如年齒益而疾
痛時纏血氣衰而參苓少效甫奮興於感激之下
旋恐怖於力疾之餘是以據實陳情懇請解任乃
蒙

溫旨褒嘉

恩綸諄切仍令臣在任調攝以副河臣孫國璽協助臣

辦理總督事務更以凡似武闡等事著臣委任代理且酌分養廉仍留為臣之用度協辦則收臂指之助代理則免行走之勞

聖恩之體恤甚周

聖心之籌畫更至臣自揣微軀恐究不能膺斯重任然而既蒙

恩諭又何敢於惜此餘生惟有殫心竭力以圖仰報皇上天恩於萬一也所有微臣感激私忱除恭疏題

謝外謹繕摺具

奏伏乞

睿鑒謹

奏

覽卿奏謝知道了卿辦理一切惟宜持其大綱仍以調攝起居為要

雍正十年十一月初三日河東總督臣田文鏡謹
奏為恭繳

硃批仰祈

睿鑒事雍正十年十月二十七日臣齋摺家人回豫捧

到臣恭請

皇上聖安摺內欽奉

硃批朕躬甚安今歲以來覺健爽倍常此皆荷蒙

上天

聖祖眷佑之所致實為過望卿體佳善否欽此臣跪讀之

下不勝懼忤踴躍仰見

皇上乾行日健保佑

天申天下臣民共戴福壽康寧之

聖主於億萬斯年矣又於臣奏謝

恩賜既濟丹摺內欽奉

硃批既濟丹朕現今服無間考其性不涉寒熱溫涼
徵其效亦不在攻治疾病惟培補元氣是乃專功御
服食將完時具摺奏請更當續賜欽此臣屢蒙

恩賜已屬逾分乃蒙

皇上令臣服完時奏請再頒

聖恩高厚實出望外臣自十月初一日起每日服食俟

將完時遵

覽

旨恭摺奏請所有奉到原摺一併恭繳再今歲四月內

蒙

皇上賜發內造鎗一桿錢糧一盒臣隨照式製造五桿

令標下兵丁如法試放準頭有二百步之遠既穩

而便實係軍中利器今將原鎗一桿敬謹呈繳合

併陳明為此謹

奏

此鎗造法極宜嚴密勿令匠役傳知外人數用則已無須多製各營伍倣倣製造尤屬不可留意戒飭毋忽

雍正十年十一月初六日河東總督臣田文鏡謹奏為據實奏請仰祈

睿鑒事雍正十年九月二十四日欽奉

上諭河南按察司員缺著南汝道盧焯補授南汝道員

缺著汝寧府知府費謙流補授汝寧府知府員缺著
總督田文鏡於屬員內揀選遞行題補欽此欽遵臣
查汝寧一府界連湖楚所轄九州縣盜多民悍素
稱難治通省開彰懷南四府同知及汝州等七州
直隸知州其品級可以題補知府者寥寥無幾殊
難揀選至知縣之中不特品級相懸且多新進之
士初試之員更無其人臣查原任湖廣黃州府知
府蔣國祥係臣妻胞弟臣深知其為人頗有性氣

然心地明白辦事勤謹其前在知府任時惟因各
上司仍取餽送是以廉隅不立及督臣楊宗仁到
任之後隨已洗滌肺腸頓改前失臣在河南距黃
州不遠知之最確不期仍以貪劣被叅此皆伊已
改之舊愆也搜查任所財物甚為有限蒙

皇上天恩賞還令其前赴臺站效力自雍正四年至臺
至雍正九年撤回在站五年在蔣國祥自知感戴
天恩力圖報效又蒙

皇上賜復原官令其在內閣學習行走此不特蔣國祥
幸出望外即臣亦感激無地何敢復有希冀然其
人未老其才尚屬可用正當竭蹶犬馬以報

天恩內舉不避親臣不敢仰企前芳然以人事

君之道臣所素知臣又何敢因係妻弟私嫌遂致隱默

可否即將蔣國祥補授汝寧府知府臣不揣冒昧
奏請

聖鑒倘蒙

俞允彼到任後不圖報效慎矢清操臣即離去河南彼
斷難瞞臣知覺臣一有所聞立即奏參亦不敢因
係妻弟而稍為寬徇也臣無任悚惶待

命之至為此謹

奏

照所請有旨諭部矣蔣國祥到任後卿其再三勗勵令
其改絃易轍勉為良吏以益前愆

同日又

奏為據實陳請再懇

聖恩解任調養事竊臣前因久病未痊又值武闈考試
奏請解任荷蒙

恩旨令臣在任調攝復

命副河臣孫國璽協助辦理

聖恩體恤至於此極臣既有孫國璽為之代理協辦自

揣稍可支持則在生一日即應圖報一日何敢復
請解退自就便安無如臣調理以來又經一月飲

食漸減脾氣日虛今於十一月初五日起咳嗽頓
發晝夜不息犬馬微軀誠何足惜第兩省封疆任
大責鉅實非病卧之人所能勝任伏乞

皇上俯鑒微忱

允臣前奏事理

敕部將河南巡撫關防齎發來豫令副河臣孫國璽暫
行署理臣一面將

欽給總督關防封送繳部俾臣解任調治倘得仰邀

聖恩日就痊愈容俟明歲春融進京則瞻

天仰

聖既得慰微臣戀

主之私而暮景餘年尚可竭微臣報

國之志也瀝血陳情淚隨聲墮謹再繕摺據實

奏請伏乞


皇上睿鑒恩允施行臣不勝感激悚惶之至謹

奏

勉從所請有旨諭部矣



硃批諭旨卷一百二十六之二十四



總校官庶吉士臣侍朝

校對官庶吉士臣翟槐

謄錄監生臣李華文